

# Tidak perlu ke muzium untuk ‘belajar’ tentang warisan



**LAKAR PELAN WARISAN:** Encik Harith Redzuan (*kiri*), yang membentangkan ideanya di sesi pertemuan Rabu lalu, menyatakan untuk memelihara warisan, Singapura harus mewujudkan ‘budaya perbualan.’ – Foto-foto FARAH REZAL

JIKA ingin mengekalkan warisan, seseorang tidak semestinya ke muzium, sebaliknya perlu mewujudkan ‘budaya perbualan’ di Singapura.

Itulah antara idea yang dikongsi Encik Harith Redzuan Mustaffa di sesi pertemuan anjuran Lembaga Warisan Negara (NHB) Rabu lalu.

Sesi tersebut dihadiri tetamu terhormat, Menteri Negara Kanan (Kebudayaan, Masyarakat dan Belia), Cik Sim Ann.

Encik Harith, 23 tahun, merupakan pelajar Universiti Nasional Singapura (NUS) dalam jurusan Sastera dan Sains Kemasyarakatan (Pengajian Asia Tenggara).

Beliau membentangkan ideanya di sesi yang dihadiri 32 pelajar daripada NUS, Universiti Teknologi Nanyang (NTU) dan Akademi Seni Halus Nanyang (Nafa).

Ini sesi kelima yang diadakan NHB bagi mendampingi belia dalam usaha menghasilkan Pelan Warisan Singapura.

Pelan Warisan itu akan mengumpulkan idea pelbagai golongan masyarakat mengenai masa hadapan warisan di Singapura.

Belia yang hadir di sesi itu berusia antara 18 dengan 24 tahun.

Mereka dibahagikan kepada tiga kumpulan dan membincangkan pelbagai topik termasuk warisan kebudayaan.

Encik Harith berkata beliau menghadiri sesi tersebut agar dapat mendengar perspektif belia lain mengenai warisan.

“Setiap individu mempunyai pendapatnya sendiri akan maksud warisan dan sebab itulah saya ke sini.

“Kita patut menjaga warisan kita demi generasi Singapura akan datang. Jadi, pendapat belia hari ini mengenai warisan amat bernilai dan harus didokumentasi dan dialu-alukan. Saya gembira melihat begitu ramai anak muda berkorban masa untuk ke sini dan berbincang bersama kami dan NHB mengenai warisan.”

– **Menteri Negara Kanan (Kebudayaan, Masyarakat dan Belia), Cik Sim Ann.**

“Saya bukan sahaja mahu belajar daripada NHB, bahkan belajar melalui perkongsian bersama pelajar lain,” katanya.

Beliau berpendapat anggota masyarakat harus meletakkan penekanan kepada interaksi bersama satu sama lain, demi mengenali lebih tentang negara ini.

“Misalnya, pelajar tidak semestinya ke muzium untuk mengenali warisan Singapura.

“Jika seseorang individu ke kedai kopitiam dan bercakap dengan orang di situ, mereka boleh mengetahui pelbagai kisah mengenai Singapura.

“Misalnya, jika anda ke kedai yang menjual teh sarbat di Bussorah Street, anda boleh berbual dengan peniaga di situ dan bertanya mereka tentang asal mereka dan sejarah kedai itu,” terangnya.

Encik Harith, yang telah ke Sumatera

tahun lalu untuk satu projek sekolah, menyedari pentingnya cara pertuturan dalam mendampingi kaum lain.

“Sebagai pengarah projek itu, saya sering bercakap dengan penduduk di situ dan saya harus mengubah cara perbualan supaya dapat mencapai perhubungan yang berkesan.

“Melalui perbualan bersama kaum lain, ia akan membolehkan kita memahami mereka, termasuk cara hidup, budaya serta warisan mereka dengan mendalam,” ujarnya.

Sehingga hari ini, NHB telah mendampingi hampir 150 belia daripada institusi pengajian tempatan.

Secara keseluruhan pula, NHB telah mendampingi hampir 600 peserta daripada pihak berkepentingan termasuk pakar warisan, sukarelawan dan pendidik dalam sesi pertemuan mereka.